

嘉禾志卷第十八

碑碣

精嚴禪寺記

佛之道至難學也毀形而苦行割愛而忍辱食以麤糲衣以壞色器以瓦鐵誦經禮佛求師問道從眾應俗登門望施修齋設供立木營造像設修爲之事無一不爲至於口腹之欲紛華之欲男女之欲凡人道之不可無者一有犯焉則有司得以治檀越得以棄天下之人莫不起而議之佛道之難學蓋如此秀州精嚴寺舊號靈光卽東晉選部尙書徐侯熙所施之

宅寺鄰於市寺亦爲市僧居於市僧亦爲市旣爲而久旣久則盛其分房裂戶以百數而爲之徒者且數百人龐眉皓首畏罪慕善閉門燕坐勤力精進者往往有之而血氣方剛聞道未篤六賊所誘一念不固者亦所不免也淳熙四年直寶文閣韓公彥質以黃岡政成聖恩優異付以茲郡公遇事精敏濟以公平下車未幾姦伏弱直優游撫馭遂以無事推其治理勤厥外護迺請於朝願以是寺改爲十方有旨從之於是籍寺所有得二萬餘緡招一因師俾主其事因資巽慳不任是責侯卽喟曰變律爲禪欲藥其病變

不如初吾且有過迺命黜因迺命諸山選一道行可
以經理者眾以十六輩諗公公於其末擇一永祚師
景壽使補其處壽公道學既高世法亦熟年未五十
而十王名刹升座之日法音宏暢舉揚宗旨合因與
果演化道俗復以叢林所立規矩先以律身還以導
人瞻聽所接內嚴外敬頑革善入一傳百應先信後
舍無有齟齬皆順以附緣法既契迺取因老所用之
餘計四千緡并舉韓使君所施之財與大眾之所施
者又爲數千緡鳩工匠會竹木商瓦甃給雇直凡爲
秀王祠堂三閒戒壇一所廊廡三十四閒法堂一十

一閒僧堂六閒雨花堂五閒前資寮行堂共一十三
閒旃檀林後架二十閒爲水田二千餘畝歲得米一
千餘石爲蘆場二千餘畝歲得薪五萬餘束經始於
五年之春三月斷手於六年之夏四月始師嘗曰寺
成當求記於王居士既成使其徒師源具以本末來
希呂使謂之曰夫應時有緣悟道有性化荆榛爲道
場闢市井爲佛地易土木爲像設改喧闐爲禪觀凡
見於有爲者是謂緣著一盂糲飯聚四方衲子大開
不二門共究無生理凡歸於自然者是謂性今師既
已奮空拳竭願力了大事破羣疑矣盍亦息乎其所

已爲而思惟其所未爲者自緣而修性由性而悟道
以上報國恩而次報佛恩乎師曰諾迺爲記之復以
偈言終之其辭曰

佛身廣大充兩儀肉身有壞法者非波旬有請不可
違雙林佛子涕淚垂六反震動人嗟咨付與迦葉法
與衣其餘佛法得者誰國王大臣專主之檀那有力
同扶持維昔東晉咸安時徐侯家居海之湄夜有光
怪經天維迫而視之井所爲迺請舍宅爲佛祠年來
井神不能奇蜂房蟻穴生瑕疵旣久而變亦其宜韓
侯凜凜百吏師有意外護非己私壽公之來乘始基

補僞百弊研毫釐以身率人人相隨內嚴外敬自此
推始終一律無可疑一唱百和風聲移中堂幻出高
巍巍廊廡繩直遠近齊方丈寮舍相發揮山田水國
日用資自起一念不逾碁算計見效如所期雖然佛
法非一岐傳道應緣實相依靈刹納子須自知請師
開門拈白槌來看兄弟相磨治以篋縛肚捐飽飢說
出諸方上下機一洗萬劫貪瞋癡佛法到此尤光輝
朝散郎試兵部尙書兼給事中兼修玉牒官兼侍讀
王希呂記

嘉定元年九月權發遣嘉興府事臣希道言臣所領郡治嘉興縣縣丞之廳正寢東室實維孝宗皇帝慶毓之地七紀於今丞轉相授與常官舍等無以稱神扈人仰之意臣至之日始徙丞居卽加汎埽繚以周櫺崇護之禮懼未弘也粵庠序生徒閭井耆老麋至謁曰往年秀以列州得名爲府近者士不繇貢羣試春官亦惟毓聖之地樞電所屆昭示渥恩而龍戲之館赤昭之宮獨後表章豈非闕與臣希道竊伏思念忘寢與食爰卽故府是諏是稽恭惟藝祖皇帝太宗皇帝赫靈誕聖於汴於洛後卽其地咸建佛刹曰應

天曰啟聖英宗皇帝繇齊州防禦入繼大統州陞節鎮是曰興德潛邸爲寺亦沿厥名載在策書可援爲比臣希道猥玷屬籍系爲秀安僖王會長孫臣祖嗣王臣伯圭嘗欲建請未及聞上纘成先志責當在臣況復際遇叨守是邦今而不言死有餘罪願卽丞廳改創佛寺且以臣疏下之中臺討論舊章賁以名額仍陞軍號得偶齊鎮上以慰孝宗在天之靈下以表臣民推尊之敬抑爲薄海生聚祈貺請福臣希道謹昧死以聞十月甲午詔禮部太常寺擬定禮部尙書臣時侍郎臣奕太常少卿臣燮奏嘉興府擬陞爲嘉

興軍嘉興縣丞廳宇擬更爲興聖禪院十二月戊辰制曰可秀人聞命驩聲如雷郡以制書從事榜揭軍名迺遂庀役徹廳創寺斤工墨師勸力子來明年十月寺告成重扉伉壯兩廡深靚左右複屋樓鐘若經中儼神御前殿後閣列肖諸佛菩薩丈室以居上首閔堂以容緇徒齋寮庖庾凡叢林規樞靡一不具爲屋大小合二百餘閒輪奐神麗爲諸刹甲園觀和會拜跪瞻依謂宜有紀昭示無極臣機埃臯政府與聞奏請詔報本末禾興又鄉郡也僉諧授簡不得而辭迺拜手稽首言曰惟聖篤生膺圖受籙天實啟之儲

祥孕靈地實成之渾淪冲漠妙於天者難以智窺扶輿鬱積發於地者可以誠攷瑤光感顓昴宿標禹傳雖不誣驗之無朕至若舜之諸馮文之岐周輿圖昭然千古在目臣子之於君父也坐見於牆食見於羹精誠所存隨寓而著過虛位必趨遭乘車必下因物起敬儼如參前而況地靈所鍾聖蹟所肇委置堙汨弗虔弗蠲人謂斯何皇上昭茲神武適追來孝宵衣菲食必勤必儉立政官人克明克謹設施措注動法孝皇至於恢顯之章尊崇之典事事物物極其豐備矧三朝成憲炳然如丹宜乎覽郡守臣之奏詔亟俞

之惟恐後也若夫建明之宜奉行之恪經始之審筭
成之速費不害公役不加民則臣希道之績視公子
奚斯爲罔愧臣亦旣敘次其事俾鑿諸石復拜手稽
首爲之銘曰

於赫孝宗

紹隆中興

武藏不殺

文緯丕平

作其卽位

二十七載

德參兩儀

仁冒四海

在厥初生

于胥斯原

禦溪之水

樵李之城

昔在光武

濟陽載育

嘉禾九穗

歲應大熟

昔在高皇

沛惟帝鄉

志十六

六

萬歲之後

魂魄不忘

惟我烈祖

發祥齊嫩

郡名昭符

屢協嘉瑞

對越在天

神無不之

迺睠於秀

永言懷思

詔作梵宮

榜曰興聖

適駿三朝

駕方軌竝

宏址穹隆

高欄飛棘

揭虔妥靈

來燕來翼

像衛嚴飭

丹雘華新

徼福金僊

敷錫庶民

禦溪淵淵

樵李業業

夾輔慶基

昌於來葉

樵李業業

禦溪淵淵

匹休宗祊

於千萬年

通奉大夫參知政事兼太子賓客權提舉國史院實錄院權提舉編修國朝會要同提舉編修敕令嘉興郡開國侯食邑一千七百戶食實封三百戶臣婁機撰

興聖寺記

天以皇朝世有明德惠洽黎民申眷命於高宗中天立極用再造我區夏孝宗夙自秀邸毓質少海以承堯禪祇若慈訓誕保此丕丕基積一執中之傳有光往牒維今嘉禾興聖禪院則上聖載育之地也斗樞繞電而壽邱輯慶赤龍遊河而慶都孕靈帝命溥將

悉夫

七

百神先後父老傳頌可考不誣慶元更元州陞爲府迨嘉定戊辰歲昉因守臣希道之請加賜軍額仍卽其所規作梵宮扁以今名所以紀長發之祥示四海以有尊也地接縣治位置褊淺無以肅視瞻甫及四紀而支傾植仆之不暇守土者何以辭其責今皇帝在位之二十八年郡當擇牧上念畿輔股肱烈祖在天之靈不忘顧歆命大臣差擇其可寄以赤子者得太府丞臣與嘗於班列卽日佩以章綬始至款謁廟廷退而諏之僚吏曰漢制郡國得立祖宗原廟我國朝陪京及車駕嘗所臨幸咸卽寺觀勅殿以奉於神

神御而洛師之應天啟聖則又卽誕生而紀瑞也維茲興聖伯父臣希道實倡之粵四十有五年而臣與嘗嗣領郡寄臣與弼同時持常平使者節按部浙右前此苟有而未全者若有待焉失今不圖人謂斯何往復究度舊基之左右乃牙民產倍其直以償之由殿堂門廡以及庖庫皆革其故而取其新不侈不陋十閱月而崇功成捐官莊田地二百七十有七畝合舊田地爲一千八百二十有八畝畀寺僧以給齋廚費出於臺郡樽節之餘不以勞民是役也大宗正嗣秀王臣師彌實主其議拜疏闕下上爲援筆大字書

流虹聖地興聖之寺入大字命鏤梓塗金揭之新剎龍蟠鳳翥日麗星暉耆老聚觀感慕灑泣臣師彌被旨袖香奏告道雪川以圖示臣公許曰此國家盛美君嘗以簪橐陪法從秉鉛槧掌內命盍爲之記庸詎久遠臣固謝不能而竟弗得辭竊惟藝祖以神武膺圖肇造繼統以太宗而天下宜定高宗以艱勤紹復遜位於孝宗而駿命以凝至公無私與天同運孫謀詒遠配天無極冊書所紀曠古鮮儷小臣固陋何敢妄以管窺惟是隆乾淳熙盛德大業得之面命心傳見之躬行實踐近接耳目爲法可傳於天下者蔽一

言曰仁曰儉而已惟仁故見善明用心剛愛惡是非
得其正惟儉故處己約待人恕刑罰賦斂得其平自
陟大位以訖倦勤授禹惟日乾乾祇畏於民巖中外
又寧風俗淳厚士大夫咸以禮義廉恥自修飭紹熙
慶元之際國家賴以扶顛持危者猶昔日所作成之
人才此無他仁儉之德積於躬者厚而化於人者深
其培養之道感移之機自有不期然而然者盛矣哉
若夫篤於尊親謙以自牧雖震夙之所未嘗一語及
焉逮寧考御圖適追來孝始克舉行曠典道隆德盛
而退藏於密業鉅事閔而民無能名刻辭豐碑所以

侈盛美於無窮示來世以必葺也臣謹拜手稽首而
述以頌曰宋受命古帝有十一世篤生孝皇神武哲
睿藝祖之孫高宗之嗣毓德青宮揖遜以有帝位丕
顯丕承克順克比厥初發祥秀水之涘帝實啟之百
靈萃止若昔壽邱樞電薦祉慶都河流赤龍紀瑞有
開必先古今一軌於赫梵宮作鎮星紀昔臣希道以
宗室子來宣藩條茲焉經始敝弗之圖鮮不心愧臣
豈假守臣弼將指同是肺腑同所出自諷之嗣王典
宗正事老臣師彌奏聞九陛皇帝曰吁天命匪易念
我烈祖宵旰致理德鉅業閔道洽政治積慶有源涵

洪演迤施及曾孫式承式繼伸紙濡墨爲八大字鳳
舞龍蟠星輝日麗欽仁颺遊聿嚴嗣志皇靈赫奕百
神翼衛心法所傳仁儉而已矣惟仁足以祈天命惟
儉足以承天意於時保之夙夜敢替小臣作頌庸侈
休美莫高匪天莫厚匪地於千萬年作宋元祀淳祐
十一年龍集辛亥仲夏初吉謹記中大夫寶章閣待
制新知婺州軍州事兼勸農使眉山縣開國子食邑
五百戶賜紫金魚袋程公許撰

重修興聖寺記

禹薦益於天至太祖生於汴而後益之子孫始得以

有天下太祖薦太宗於天至孝宗生於泚而後太祖
之子孫始得以享天下猗歟盛哉天爲太祖後生孝
宗故爲太宗後生高宗高宗生與太祖同丁亥此天
心也卽位同南京改元建炎同建隆此聖心也而人
未之知有臣寅亮慨念湯緒知天心聖心矣而不知
虹光照室已應於卽位改元之冬嘉禾紀瑞又先如
漢中興時矣三后在天世德作求如編雅當申以下
武之述周者天旣生孝宗於浙之右以紹中興之烈
復生理宗於浙之左以衍百世之祀初嘉定守臣希
道建寺淳祐守臣與豈乞扁至是奎文樞光交煥河

漢中更寶祐乙卯鬱攸之災官軍士民衛神御惟謹
戊午旨頒祠牒若干道爲修復計下之郡從嗣王師
彌請也郡未果修明年景定庚申復以元賜命主僧
淨志任責從嗣王與澤請也申錫無疆及爾斯所如
編頌當儕以烈祖之述商者淨志當事自方丈法堂
以內規以立咸濟己巳特選主首以僧惟實當事暮
年兩廡山門以外工以備癸酉春旨奉安神御又從
主祀與澤請也新廟奕奕寢成孔安一如祖宗制安
居粒食優游閑暇亦便浮屠教夫孔曼且碩萬民是
若理之常也乃如之人兮西方之人兮同事釋氏同

師偃溪今乃能同力以事君惟實嘗興寺洪都謂叶
唐五百年佛讖今乃前作後述復百二十年潛邸盛
典至此知人心之天卽天心之天也惟德動天無遠
弗屆如編書正當驗之以益贊於禹者謹拜手記本
末以俟編之詩書之策朝奉郎添差浙東安撫司主
管機宜文字兼福王府教導官周方記

重建慈恩塔院記

余幼肄舉子業周遊問學詣郡則憩天慶坊劉氏邸
絃誦所餘暇婆娑金魚池月波樓下慈恩塔院北池
樓側吳省郎說所題額及護國保民諸天道場扁愛

其書畫婉麗駐目玩視不能去亦愛金魚月波一扁
篆古而隸雅惜三者輪奐未稱景趣耳自余隸東學
策末第三任從官舊遊夢隔及茲重來慈恩鼎新改
觀伫立慨嗟有老衲祖輝者揖余曰此院以開寶年
斲地得石佛石香鑪相輪舍利而建□□□□佛
院也治平改今額建炎□□而隳一塔亭亭獨存餘
悉就圯余二十年竭力起廢龕經繪藏昉庚午秋開
軒□塔北辛丑歲僧堂重剏大殿莊嚴丙子至甲申
而備庫院徹蓋鐘樓葺飛庚子至癸卯而成洪鐘釁
治於今春西方建場於嗣歲內外粗具已方圖紀刻

悉六

三

君周覽興慨龜趺其屬筆哉因喟然曰王荆國昔記
龍興寺謂孔氏之道易行非若浮圖氏苦身窘形之
難也然此每失之而彼得余前未之信也今輝也獨
能以三十年不怠志力而中興頽圯舊扁具存典刑
不泯而金魚月波尺椽片瓦莫加焉公飾改題去舊
幾相什百此失彼得甯不信然其有以□之歎不自
□□□□者得無啟於斯言淳祐五年上巳日宣
教郎知紹興府諸暨縣主管勸農公事兼弓手寨兵
軍正趙孟堅記

招提教院置田記

嘉興招提教院攷之紀載則唐刺史曹君之故居也
光啟四季舍以爲寺敕名羅漢院國朝治平初改賜
今額規模雖未大然在元祐閒名公鉅卿如荆國王
公內翰蘇公更唱迭和寄題靜照篇什盈軸靜照卽
院之一室也能以一室聲聞京師蓋亦名刹矣中間
一罹建炎之兵火再厄寶慶之震陵殿堂摧圮而弗
修廊廡傾頽而弗葺紹定壬辰寺鄰吳供檢煥憫然
動心自捐己帑鳩工聚材聞者樂助鄉僧懷敞開其
端師誼贊其成自山門以至漏室輪奐一新嘉熙己
亥繼以懷禮啟請檀那曰規模視昔固已大矣廣其

居無以飽其徒可乎於是已施者無勸心未施者皆
興念遂得常屋以爲香積卒歲之儲由今而始苾芻
之供可以繼矣蒲塞之饌當不乏矣懷禮款門求余
紀之并欲列檀那名氏書之碑陰余辭不獲姑爲述
其大槩旣而語之曰師亦知夫一飽之不易得乎夫
捐金得土以爲爾刹縣遠之利檀那不多得也寒耕
暑耘以應爾眾饘粥之需農夫亦甚艱也師盍歸語
諸徒曰如來積功累行至現報身於王舍城猶未免
持鉢乞食今之爲比丘者願何修而受成若是要當
審慕因果進其學業諦想其空法室絕其塵妄以祈

福祥以酬施惠庶幾可耳毋徒曰我等瞿曇氏之種子也法當受是懷禮曰唯嘉熙庚子暮春旣望朝散郎新知雷州軍州事兼管內勸農事借紫徐植記

惠安禪院記

昔釋迦拈花正眼先付大機大用普遍河沙利及四生功霑九有從窮三際橫互十方萬象森羅頭頭具足自是慧燈繼照久而彌芳歷代宗師相印茲道同體異用警悟羣迷瞬目揚眉拈槌擊拂交馳棒喝坐斷死生無非得佛心宗悟佛知見嗚呼盛哉若乃帝釋折草梵宇翬飛貝闕珠宮丹楹刻桷長廊廣廈複

悉六

四

殿重樓建立於屈伸肘閒成就於剎那頃際變化莫測凡聖難窺嗚呼休哉像教肇興聖君出御宏持正法益使流通得折草神通具拈花妙用兼二德者閒有人焉南徐焦山成之孫汴京妙慧光之子長水惠安立其名者乃常人也有佛子願力具丈夫身心於遊戲中見殊勝事回狂瀾於旣倒銷魔外於已陳體用如一理事無礙遂能鼎新寶社特立叢林斬斬可觀得未曾有見者歎仰焉方立之披榛也余適取道於此喜其道力人事爲眾所歸寬猛得中疾徐合度知其必有所就也越三年余守是邦閒從賓客過之

昔所謂瓦礫者今楹桷雄麗矣昔所謂荆棘者今金碧輝映矣高堂深邃萬瓦參差鳴鐘鼓之新音唱宗乘之妙旨立於茲方可謂能矣奮掣電之機雖末山總持豈容專美有超師之作使焦山妙慧不殞餘芳於見比丘尼身者豈易得耶一日立偕其徒力請爲記歲月余憫其苦志而喜其有成故爲書之惠安本星居也其徒以立聞於州刺史王公浚明請於朝始更禪刹命立來主道場實紹興七年閏十月也合喜法雲堂方丈浴室與夫廚庫之屬靡不周足唯佛殿尙缺焉會見得髓得皮之人共助出力出財之施矣

復何憂哉余識成於京口見光於夷門會立於吳興知之爲詳故於營建之外爲紀本末尤悉主僧名道立號祖鑑錦城人云紹興甲子四月壬午朝請大夫充祕閣修撰權發遣秀州軍州事主管學事兼管內勸農事交安縣開國男食邑三百戶賜紫金魚袋信安劉阜民記